

名媛詩話

名媛詩話序

鴻雪樓詩集武母沈太淑人所著太淑人籍隸錢塘
爲安徽寅齋武公德配予未至京時卽耳太淑人才
名吾鄉李世娘武恭人爲太淑人女雅擅文翰慈教
也予因李而得識其兄悅堂悅堂以優行貢成均觀
政刑部其爲人溫厚和平口不談詩而貌言舉動均
合乎詩之旨得乎詩之味殆深於詩學者也今刊其
慈闈所著名媛詩話十二卷予受而讀之夫詩始二
南二十五章中或后妃自作或作於宮人或作於諸

侯夫人或作於大夫妻或作於婦人女子誦者疑
詩章何以多出於閨人予曉之曰古者丈夫勤於主
事迫在功業略在詞章故感時觀物智慧生於靜境
涵泳觸於閒居詩固婦女事也特後世詩教不明工
風雲月露之詞失興觀羣怨之義而閨閣能此者日
少實於風俗人心所關非淺况徵詩閨閣極難或祕
不示人或遠莫能致富貴既無因索稿貧賤更無力
付梓唯太淑人才極大心極細量極虛十二卷中所
載信乎德必有言性情之章修齊之助也學問之什

陶淑之原也贈答之文道義之範也感慨之語名節
之箴也傳在古人勸在今人覺在後人厥功偉哉悅
堂以是編公之天下孝子之事其卽仁人之心也夫
光緒丙子山陽秦煥謹序

名媛詩話卷一

錢塘沈善寶湘佩著 受業會稽宗 康校字

自南宋以來各家詩話中多載閨秀詩然蒐集簡括
備體而已昔見如皋熊淡仙女史所著媛仙詩話內
載閨秀詩亦少竊思閨秀之學與文士不同而閨秀
之傳又較文士不易蓋文士自幼卽肄習經史旁及
詩賦有父兄教誨師友討論閨秀則旣無文士之師
承又不能專習詩文故非聰慧絕倫者萬不能詩生
於名門巨族遇父兄師友知詩者傳揚尙易倘生於

蓬華嫁於村俗則湮沒無聞者不知凡幾余有深感焉故不辭摭拾蒐輯而爲是編惟余拙於語言見聞未廣意在存其斷句零章話之工拙不復計也

同里顧和知

若璞

前明上林苑丞友白女副車黃茂

梧室諸生黃熾母著有卧月軒詩文集文多經濟大篇有西京氣格常與閨友宴坐則講究河漕屯田馬政邊備諸大計每夜分執卷吟諷曰使吾得一意讀書卽不能補班昭十志或可詠雪謝庭嘗於食頃作七夕詩三十七首一時歎其敏妙和知早寡侍舅孝

訓子嚴暮年纂黃氏宗譜立義田年九十無疾終節
行文章爲吾鄉閨秀之冠惜文集早經散佚擷芳集
言之甚詳池北偶談正始集俱載之詩如和夫子西
溪落梅云迤邐入西溪溪流深幾曲斷岸挂魚簪茅
檐覆修竹翠羽何啁啾滿林香撲簌晴雪飛殘英坐
愛傾蟻綠鹿門跡未湮與子同歸宿湖上云湖光渺
渺冷煙微水鷺沙鷗竚不飛恰欲抱琴輕別去菱荷
分綠上羅衣

歙縣畢韜文

著

隨父宦游蒞邱父與流賊戰死屍爲

賊擄衆議請兵復仇韜文謂請兵則曠日賊且知備
卽於是夜率精銳劫賊營賊正飲酒兵至駭甚韜文
手刃其渠衆遂潰追之多自相踐踏死乃與父屍而
歸葬於金陵時韜文年祇二十後適崑山王聖開裙
布荆釵無復往時義勇氣矣余讀其傳而慕之傳爲沈來
遠作紀事詩云吾父矢報國戰死於薊邱父馬爲賊乘
父屍爲賊收父仇不能報有媿秦女休乘賊不及防
夜進千貔貅殺賊血漉漉手握仇人頭賊衆自相殺
屍橫滿阮溝父體與櫬歸薄葬荒山陬相期智勇士

慨焉賦同仇蟻賊一掃盡國家固金甌韜文此事與
前明道州遊擊將軍蕭山沈雲英事同雲英隨父宦
道州守備父與賊戰力盡爲賊所殺雲英卽率兵入
賊壘斬賊首搶父屍而歸固守城池賊兵不敢窺伺
事聞於朝卽勅雲英爲道州守備尋升遊擊將軍辭
不受扶柩歸里授經課讀爲生聞國亡赴水以殉爲
母救免終身疏布不言國事

山陰商嗣音

景徽

徵士徐咸清室著有咏離堂詩草

嗣音年八十容貌如二十許猶吟詩讀書不衰詩如

子夜歌云弄水恐前裘采蓮畏傷手花欹半面粧願
得花間藕五彩織薰籠爐灰皎如雪不棄燕殘香爲
愛心中熱深得樂府體裁女昭華伊壁諸生駱加采
室著有徐都講詩集工楷隸善丹青幼承母教名重
一時爲毛西河太史高弟塞上曲云朔風吹雪滿刀
鐔萬里從戎何日還誰念沙場征戰苦將軍今又度
陰山

山陰祁修嫺

德瓊

前明祁忠惠公

彪佳

女諸生王鰥

叔室母商媚生夫人

景蘭

姊弢英

德淵

著有靜好集

妹湘君

德菴

諸生沈萃社室著有寄雲草一門風雅

皆有才名修嫺和黃皆令遊密園云十年往事悲星
散千里交情共月圓
發英云繞徑黃花歸故里滿堤
紅葉送秋聲
湘君新粧云一奩秋水寒無影十樣春
山淡有痕嫂氏會稽朱趙壁

德容

諸生祁奕禧室送

黃皆令回鄉云青青楊柳枝飄搖大道旁大道多悲
風遊子瞻故鄉執杯送行客淚下沾衣裳憶昔弭遠
棹明月浮景光杯觴極良宴歌舞開華堂好鳥得其
侶舉翼雙翱翔膠漆兩不解金石安可方分袂起倉

猝永夜生悲傷吳山何渺渺越水何茫茫芙蓉憑秋
波熠燿吐幽芳採以奉所思所思難可忘

秀水黃皆令

媛介

楊世功室著有湖上草如石閣漫

草楷摹黃庭經畫法吳仲圭幼字楊楊久客不歸會
有大力者艷其才欲奪之父兄勸改字誓不可卒歸
楊順治初城破同楊播遷於吳越間名噪兩浙每至
西泠僦居斷橋小樓賣詩畫以自給稍有餘便不作
也自敘云家世中落生蓼長荼饑不食邪蒿之菜倦
不息曲木之陰其品學可想湖上秋日云憂危只有

客心微贏得湖光蔽竹扉囊有千詩聊寄賞家無四
壁亦懷歸青山斷處饒紅葉黃菊開時少白衣近水
陰晴容易變忽驚風雨打窗飛姊皆德媛貞立秋云
涼到半庭分夏去夢將一字許秋成

莆田黃漢薦

幼藻

孝廉林恭卿室前明通判譚女與

妹漢官

幼蘩

俱擅才名而漢薦尤工文章夫亡以清

節稱著有柳絮編咏孤雁一律沈著悲涼詩云渺渺
高秋外長空一雁遲哀鳴關底事淡遠寫相思瘦馬
征夫淚迴文少婦詩明年樓上過莫向夕陽時漢官

詠月五古云清切空階月相依欲二更寂喧非一致
千秋同此明蕭蕭庭中女俯仰觸中情對此令人遠
况乃兼秋聲淺深各有感今昔甯無驚秋在孤雲外
愁從何處生人生有代謝萬物有衰榮茫茫乾坤裏
相積爲愁城欲挽西江水一洗襟懷清虛窗來素影
清淚落寒檠兩人詩筆頗清似工於愁者

嘉定侯儷南

蔡宜

詩生龔元侃室前明文節公

岐曾

女著有宜春集儷南遭家變歸龔貧甚閉門辟纊有
偕隱之志人稱梁孟高風病中述懷云秋風策策雁

來遲病況纏綿強自支有藥難醫貧到骨無錢可買
命如絲燕臺夢隔三千里槐枕腸回十二時兒女關
情誰判遣聊憑一紙寄君知妹若英

懷風

感昔云黃

河流水響潺潺當日腥風戰血殷大地盡拋金鎖甲
長星亂落玉門關居延蔓草縈枯骨太液芙蓉失舊
顏成敗百年流電疾蒼梧遺恨不堪攀感慨沉雄各
極其妙

無錫龔鵬紅

靜照

前明殉難中翰

佩潛

女工書善畫

所適不偶境甚淒楚乙丑歲暮雪窗感成云謝庭咏

絮記承歡極目沉香付逝湍去國事存翻野史孤臣
魂斷返遙灘攤書讀映晴光異煮茗嘗嫌水味寒高
卧未妨衾獨擁小鬟驚報雪漫漫清明云桃花春水
漾愁紅作意新苔繞畫櫺酒覺多情偏入夢花憐有
恨尙隨風難消蠹癖依干帙未了蠶絲結一叢幾念
先人青塚路紙錢飛蝶隔牆東贈周寶燈女史序云
寶燈名炤江夏人父某爲山東按察司僉事死闖賊
之難炤嘗作悼懷賦後歸漢陽李生以篤自寫坐月
浣花圖圖末小印篆曰絡隱蓋又字絡隱云詩云藥

房新詠氣如芬柳絮名高自不羣握管獨吟詩博士
畫眉爭識女參軍嬌藏金屋音猶遠緩步香塵意自
殷祗爲天涯消息杳幾番愁捫石榴囊海甯陳靜閑
守範給諫存理女諸生願宜會室著有靜閑遺詩有
寄鵲紅二絕云詩狂心性與君同遺世搜奇興不窮
見說綠窗諸劍術白雲深處禮猿公自入秋來興味
闌客窗酬和墨雲殘壺中別有閒年月篋裏陰符夜
夜看味此詩鵲紅爲人亦頗恢奇也

益陽郭純貞爲前明中丞郭都賢女幼字某生遭亂

失散貞節自矢以驛梅驚別意堤柳暗傷情十字仿
離合體製閨怨詩事載益陽縣志詩選二云馬蹄踏
破板橋霜四顧無人暗斷腸幸有香魂縈妾夢驛門
深鎖五更床木蘭初發送雲鵲人去南州路幾千毋
謂滇池迷雁跡梅花傳信待君還四川富順劉氏忝
將蕭某室氏流寓滇南夫官雅黎順治十六年己亥
明桂王朱由榔走緬甸滇南兵亂氏以七歲兒付家
奴遣之蕭任自取壁間驛梅驚別意堤柳暗離愁十
字仿離合體題十絕句欲自縊聞兵至急攜幼女赴

井死尋郡守上其事入祀節孝事載富順縣志詩選
二云馬革何人能裹屍四維不振笑男兒幸存碩果
傳聞閤驛使無由到雅黎木偶同朝祗素餐人情說
到死真難母牽幼女齊含笑梅骨稜稜傲雪寒二人
遇亂同貞烈同而詩體又同事亦奇矣

廬陵朱遠山

中楣

前明宗室議汶女兵部侍郎李元

鼎室尚書振裕母著有石園隨草文江唱和集鏡閣
新集有枕稜劃得金釵響爲記深宵夢裡詩二句爲
人傳誦

同里柴如光

貞儀

前明孝廉雲倩女諸生黃介眉室

如光工丹青圖繪寶鑑稱其花卉翎毛無不超妙題

烟江疊嶂圖云誰將素練染霜毫幻作空濛萬里瀟

一片孤帆何處落千山雨色暗江皋妹季嫻

靜儀

諸

生沈漢嘉宰著有凝香室詩鈔北堂詩鈔季嫻工寫

竹梅嘗與閨友林亞清顧啟姬錢雪儀馮又令張槎

雲毛安芳諸君結蕉園吟社羣推季嫻爲女士祭酒

詩如與家婦朱梁則云深閨白日靜熏香垂羅幃病

起罷膏沐澹若明河秋自汝入家門操作苦不休蘋

藥既鮮潔戶牖還綢繆丈夫四方志錢刀非所求惜
哉時未遇林下聊優游相對理琴瑟逸響隨風流潛
龍慎勿用化雞乃貽羞寄言闔中子柔順其無憂諸
子問詩法口占云四傑新吟開正始高岑諸子各稱
能英華歛盡歸真樸太白還應讓少陵季嫺詩落落
大方無脂粉習氣

同里朱道珠

柔則

號順成諸生沈方舟

用濟

室著有

嗣音軒詩鈔道珠爲季嫺家婦工詩善畫性復賢孝
寄遠曲云恨少垂楊柳殷勤繫玉鞍夕陽鴉背暖春

雪馬蹄寒入世逢迎拙依人去住難痴兒啼向我昨夜夢長安獵獵風初勁沉沉雨未闌因憐兒被薄轉念客衣單栖燕將雛去征鴻失侶寒居家與行路同是一艱難河渚觀梅約顧女春山云

原註女郎相期方舟妾

河渚玩春華一棹迎風路未賒樓外有梅三百樹美人不到不開花

道珠情深於詞筆妙如環

同里錢雲儀

鳳綸

進士安侯女侍御肇修姝貢生黃

式序室著有古香樓集散花灘集雲儀爲顧和知曾孫婦能嗣其音嘗以楊子雲作二十五箴不及女史

遂作彤管箴以補之哭伯兄云在昔皇天傾覆卵無
完理兄不卽身殉感奮良有以靡寧雙七首一夕再
三起千鈞重一發恐復憂天只荏苒歲月間隱痛入
骨髓未堪嚙人胸抱疾忽焉死尸床目不瞑不繼非
人子尙有娥親在李壽汝莫喜秋日簡林亞清云城
闌咫尺卽天涯惆悵離羣雨不知日暮涼風棋散後
夜深微雨雁歸時窗前橘柚隨多少檻外芙蓉發幾
枝同入清秋不同賞却憑青鳥寄相思

同里林亞清

以甯

進士綸長女侍御錢肇修宰江收

章善書畫尤長墨竹著有墨莊詩鈔鳳簫樓詩集憶
父禹都云曉登百尺樓遙望中條山天際有白雲日
夕自往還去來何寥邈引領難追攀誰云生女好少
長違親顏豈不眷庭闈安能事間關問寢久疎濶視
膳良以艱回步循南陔躑躅淚洸瀾寄啟姬雲間云
柳上浮家小結廬水軒竹檻稱幽居問人新借簪化
帖教婢閒抄相鶴書蟻子避潮緣硯席螭奴拾月上
階除清閨事事堪題詠刻玉鏤冰恐不如穀雨云草
草深閨度歲華生平不解問桑麻沿籬野豆初牽蔓

繞砌山桃半著花。細雨漬成楊柳色。暖風催放牡丹
芽。村姬結束新螺髻。傍曉比鄰喚採茶。亞清詩筆蒼
老不媿大家。

同里顧重楣

長任

號霞笈仙妹。徵士林以畏室著有

謝庭香詠梁案吟。年十二即能應聲詠梅花云。小閣
月初斜。東風透碧紗。枝頭應有信。春意在梅花。惜早
世。未與蕉園之社。妹啟姬姒諸生鄂幼興室啟姬精
音律所製詞曲有一輪月照一雙人面爲王阮亭尚
書所稱宋牧仲尚書最賞其花憐昨夜雨茶憶故山

泉一聯惜全集未見耳

同里馮又令

嫺

大令仲虞女諸生錢廷枚室讀書過

目成誦下筆文如夙攜尤工繪事著有湘靈集和鳴
集和夫子云李廣當年亦未侯書生何必苦悲秋香
存待執咸陽柄志遠曾歸石室囚滿目雲霞俱是幻
半庭松竹儘堪收同君翰墨閒消遣已覺身居百尺
樓襟懷恬淡頗得隱居之樂

同里張槎雲

吳

字玉琴孝廉義垣女諸生胡大滌室

著有趨庭詠琴樓合稿槎雲幼慧七歲學詩卽有白

馬嘶風秋草寒殘風殘雪斷橋邊之句後與柴季嫺
等侶和稱蕉園七子年僅二十五而卒觀潮云風急
秋江晚潮生落照前遠疑千練白高並一山懸孝感
曹娥志忠留伍相賢千秋遺恨在故令怒濤傳妹玉
霄昂洪文蔚室著有承啟堂吟稿哭姊槎雲云憔悴
與心傷無言祇斷腸淚從今夜盡別是此番長滄海
渾難問泉臺不可將芳魂心杳杳何日更同行一往
情深不堪卒讀

毛安芳

媿

諸生先舒女徐鄴室著有靜好集安芳幼

承庭訓刻苦吟詩年老無子嘗自持其詩卷曰是我
神明所鍾卽我子也詠雪云天涯一望茫茫白積玉
堆瓊亘長陌興來何處子猷船高卧誰家袁安宅山
中千樹噪饑雅自掃冰鱗自煮茶不怪滿身寒起粟
只愁壓折老梅花

觚臄載桐城吳氏所居名棲梧閣世遂利棲梧閣吳
氏秉性高潔好讀歷代史鑑金陵懷古詩最佳南齊
云六貴同朝激虎彪橫江勒馬下西州銀燈酒市春
雙靨玉屨蓮臺月半鈎趙鬼西京諳漢賦阿兄東閣

擅通侯誰知講武施頭入芳樂笳聲碧廓秋梁云同
秦一人歸佛地壽陽千騎渡江波盟成自取金甌缺
蔬絕空陳鷄子多五月誰勤君父難七官先反弟兄
戈江淮廢後襄陽促秋草臺城放麋駝陳云臨春閣
上萬花妍寶帳朱簾嶺蕭煙鼙鼓飛衝朱雀路軍書
壓損繡床邊嬌娥入月昏銀鏡狎客還家碎錦箋
有景陽宮畔井胭脂春水咽殘絃南唐云江南一劍
捲秋霜半壁江山入洛陽百尺樓空蓮葉碎翠微亭
冷鳥聲荒臨城悽愴填宮曲辭廟倉皇聽教坊日夕

淚痕誰洗面錦書封恨報紅粧又載桐鄉顏宛在迺
非其偶悵鬱而逝遺稿二絕云秋入重門夜似年
蘭香燼不成眠梧窗坐聽瀟瀟雨挑盡殘燈獨黯
然黛痕銷滅兩眉峰強起臨妝意已慵對鏡尙疑非是
我可能描取舊時容悽楚之音令人酸鼻宛在姊柔
仙芳在送春詩有綠酣鶯語老紅瘦蝶魂癡之句亦
頗清麗

武進沈采蘋周浣初侍郎

青原

室夫人事親最孝詩

筆亦清秋思云花陰滿地影纖纖入夜風來怯卷簾

掃盡浮雲天宇淨動人秋思是銀蟾

奉天鐵嶺許氏爲鎮平將軍一等男諡襲毅徐治都
室夫人精韜鈴善騎射偕襲毅公出兵每自結一隊
相爲犄角以故戰功居最康熙十三年吳逆犯湖南
襲毅往援彝陵夫人駐防江口十五年鎮將楊來嘉
叛應譚洪夫人脫簪珥犒師曉以大義沿江剿殺屢
却之八月猝犯鎮署夫人中礮歿將軍蔡毓榮具狀
以聞特 旨優卹予雲騎尉世職以次子永年襲事
載正始集馬上歌云快馬輕刀夜斫營健兒疾走寂

無聲歸來金鐙齊敲響不讓鬢眉是此行俠氣豪情
溢於楮墨

漢軍蔡季玉

現

將軍毓榮女尙書謚文良高其倬室

有蘊真軒詩草夫人才識過人魚軒所至幾半天下
文良名重一時奏疏移檄每與夫人商定隨園詩話
載文良公與某不合屢爲所撼公詠白燕第五句云
有色何曾相假借沉思未對夫人至代續云不羣仍
恐太分明蓋規之也閨閣中具經濟才者詩筆極其
雄健如關鎖嶺云山從絕域勢遶分天限西南自昔

聞烽靜戍樓。狐上屋風喧。古木鶴驚羣。橫盤石磴危。
通馬深鎖雄關冷。護雲叱馭昇平猶覺險。揮戈誰憶
舊將軍。九峯寺有感。家大人云。蘿壁松門一徑深。題
名猶記舊鋪金。苔生塵鼎無香火。經蝕僧廚有蠹蟬。
赤手屠鯨千載事。白頭歸佛一生心。征南部曲今誰
是。牘有枯禪守故林。江西坡云。西嶺千重簇劍鋌。曾
麾萬騎驀羊腸。鬼燈明滅團青血。野塚荒涼嘯白楊。
夢斷層霄空漠漠。事隨流水去茫茫。只今牘有殘兵
卒。指點空山說戰場。辰龍關云。一徑登危獨惘然。重

關寂寂鎖寒煙遺民老牘頭間雪戰地秋閒郭外田
聞道萬人隨四馬曾經六月墮飛鳶殘碑灑盡諸軍
淚苔蝕塵封四十年

曲阜孔蘊光

麗貞

博士毓塏女戴文誥室著有藉蘭

閣詩草以節

賜旌縣志入贊淑傳春暮懷劉氏表

姊云閒庭梧影靜曲徑落花鋪地徘徊風響天空片
月孤新詩懷舊侶短楮寄長途不識清宵立猶思小
閣無同里顏氏號恤緯老人耶中允敏女孔興焯室
著有晚香堂集贈別藉蘭主人歸濟南并序云孔麗

貞字蘊光博士宏興公女太僕卿戴公兒婦也精詩
畫翰墨結稿甫一載夫旋死未幾其同產兄亦死博
士公無子復逆蘊光歸居里第其兄先聘李氏未成
婚矢志不他適蘊光與同事博士翁媪無間言時有
兩家奇節萃於一門之稱迨博士翁媪謝世喪葬如
禮乞於大宗爲立嗣焉蘊光復以在營無所依返之
夫家還灤水上頓行矣遣老婢來贈余畫簪一藉蘭
閣詩刻全冊用爲留別且索余詩余自夫子亡後四
十餘年茹荼集蓼與蘊光同其懷楚而蘊光之天親

骨月凋零欲盡則視余爲更烈晚牕脫稿遂成悲風
怨雨之音素紙寄將誰和別鵠離鸞之調當世不乏
名媛睇觀此詩庶知余兩人苦衷云爾詩云蓬轉信
無定人間多別離曰歸愁短髮分手易前期閨閣神
仙品綺羅冰雪姿長成惟嗜學生小自吟詩黃鵠歌
何速青鸞舞已遲旣傷慈母背旋痛阿爺隨黽勉營
喪葬倉皇誓墓碑一門同作鬼兩世竟無兒婦烈其
裘重女孀繼述奇剪刀收破碎書篋理殘遺返魯尋
田宅辭齊閱歲時蕭條君與我邂逅友兼師就正疑

難字還傾深淺卮曉葵和露折香糯共煙炊事往常
中變途窮每遇歧駕車辭里閑秣馬向天涯洗繁煥
行色賣琴充路費昨朝詢媼婢來日賦驅馳留贈團
樂扇重題絕妙詞庭篁存密節河柳挂長絲看劍孤
懷迴牽衣獨淚垂他鄉應健飯故國總相思未卜鷓
鴒穩難逃斥鷃嗤遙知明月夜新有夢參差

直隸豐潤顧芬若

荃

中丞諡文毅馬雄鎮側室芬若

工書善畫康熙甲寅文毅公撫廣西值吳逆叛不屈
被害芬若偕諸眷及同伴自縊夫人李氏視棺歛畢

北向再拜舉火自焚婢妾十八人殉焉詳一統志蔣
若生太史演爲桂林霜傳奇芬若題自畫梅竹云欲
寫孤山處士詩幾回握管費尋思水邊籬落真情絕
萬个琅玕玉一枝

沅陵杜小英遇吳逆亂爲營兵所掠立志堅貞衆莫
敢犯舟至小孤山投江死其屍逆流三日浮至故居
水濱夢訴於父母驚起跡之獲其屍並得其懷間絕
句云小小伶僇畫閣時詩書曾奉母爲師波濤向夜
悲何急猶記燈前讀楚詞狂帆慘說過雙孤掩袖潛

潛淚欲枯葬入江魚浮海去不留蓋塚在姑蘇又有
張陽鄭淑秀年二十未字順治甲午遭兵亂爲游卒
所掠投湘江死七日後屍始浮山顏色如生臂繫紅
綾一幅書辭世詩云當年豈閤重如珍誰道離羣向
水濱寄語雙親休眷念入江猶是女兒身廣州李氏
順治庚寅兵亂夫投珠江死氏被掠義不受辱囚於
土室乘間題詩於壁而縊詩云恨絕當時步不前追
隨夫壻越江邊雙雙共入桃花水化作鴛鴦也是仙
又有陽朔秦玉梅被掠題詩伏波巖自沉潭中者多

才奇節皆可傳也

蓋州劉夫人侍郎諡忠毅陳啟泰室夫人隨忠毅官
福建巡海道康熙十三年耿精忠叛僞檄傳至公拒
不應會海寇攻城急度不可支乃偕夫人令妾婢子
女二十一人先就縊夫人題詩從容殉節公隨自經
詩云厄運逢陽九妖氛起自東力難除大逆情願效
孤忠祗爲君臣重還將兒女同闔門齊死孝含笑九
原中危迫之中詩能如此工整平素學力可想

海甯陳問軒

永濟

侍郎諡忠節葉映榴室忠節公官

湖北糧道時值康熙二十七年裁兵夏逢龍作亂公
命大夫奉母穴牆出匿民間公罵賊自到夫人侍姑
家居孝養備至時盛稱之與圓明女冠談禪云不落
機鋒豈鈍根茶灰留客話桑門蓬壺色相依然在
龍鬣經函且共論幾杵霜鍾消白晝半龕燈火定
寶輝繁華勘破真生受我亦生平拜佛恩

婦人集載顧和知子婦丁連璧

玉如

慷慨好大略嘗

於酒間與夫論天下大事以屯田法壞爲恨曰邊屯
則患戎馬官屯則患空言鮮實事妾與子戮力經營

倘得金錢二十萬，便當北闕上書請。淮北閒田墾萬畝，好義者出而助之，則粟賤而餉足，兵宿飽矣。然後仍舉鹽筴，召商田塞下，則天下可平也。其大言如此。連璧繼母張姒，音才學，與和知匹。嘗作討逆闕，李自成檄詞意激烈，讀者如聽易水歌聲，惜未見也。

莆田周明璣

庚

諸生陳承纘室，生平著撰，未見流傳。

尺牘數則，頗覺清老。與仲嫂云：感念化者，欲爲陳立傳，以之才之美，無子無年，搦管垂毫，惟聞猿哭，是以更端未就，當續成之，敢不誠於陳也。又云：三國志經

嫂黜定庚應窮其贊辭但不解於古人何所厚薄只
覺此心爲劉與外云離騷之所以妙者在亂辭無緒
緒益亂則憂益深所寄益遠古人亦不能自明讀者
當危坐誠正以求然後知其粹然一出于正卽不得
以輿鬱高深奇之也又云林媛松石圖已見歲寒之
志欽其至性以一絕風之畫首矣亦不敢展玩恐風
雨悲鳴也仲嫂能定三國志林媛能作松石圖新婦
俱於此不凡明瑛有繡美集

又載吾鄉吳柏舟柏舟未嫁而夫卒柏舟衰麻往哭遂

不歸母家。苦節十餘年。遭疾夭歿。著有柏舟集數卷。
詩極鍛煉。詞尤富而長調更工。不減徐湘蘋夫人也。
古文尺牘。在明瑛之上。

無錫顧文婉。自號避秦人。工詩詞。浣溪紗云。風雨妨
春苦。不寬開簾。怕見嫩紅殘。錦屏深護。早春寒。新嬾
一身扶不起。愁痕萬點。鏡慵看。空拈斑管。寫長歎。又
云。曉日凝粧上翠樓。惱人春色徧枝頭。湘簾風細蕩
銀鈎。燕子未歸。寒惻惻。梅花初落。恨悠悠。重門深鎖。
一天愁。文婉爲主事侯麟勲母。著有棲香閣集。

長洲湯畹生

淑英

暮春南鄉子云天氣最無憑乍雨

還晴又做陰時候困人三月也清明暗買韶光柳釀
金杯酒恣閒吟寂寞春庭鬪草心院落黃昏簾幙靜
深深獨坐譙門又起更筆致與顧文畹相似畹生爲
休甯吳翻室

吳縣徐文琳陳子長聘室文琳本湘蘋夫人族姪女
幼字其子後陳隨父謫戍藩陽卒於戍所文琳賣志
母家或勸他適荅曰富貴而許患難而背我不爲也
越四載湘蘋夫人得請而歸文琳曰我家矣遂歸

陳孝養以終過蓮他庵訪圓明女師云精廬屈曲倚
雲根松樹周遮不二門頓使塵緣都洗滌懶將世網
一評論山花遶徑名難辨齋磬聲沉日又昏小衲壇
前閒指點賜旛曾得沐君恩

元和吳氏鄒延玠室延玠因案繫獄應藉家口氏度
不免投繯死面色如生一手持自畫小像一手握袖
藏其夫獄中所寄書女秀姑年十歲痛母亡不食死
氏題竹云愛看窗外蕭蕭竹未許閒窗盡日扃煙雨
却添新染碧冰霜不斷舊來青家貧已自無開謝春

去何因有醉醒最
是夜闌殘月裏伴他疎影立空庭
有才無命可爲歎息

如皋范洛仙妹孝廉李延公室著有貫月舫集聞蟋

蟀云秋聲聽不得况爾發哀吟遊子他鄉淚深閨此
夜心已憐粧閣靜還慮塞垣深蕭瑟西風緊行看霜
雪侵詩頗警策

常熟沈素君綺諸生殷增室有環碧軒集素君讀書

數行並下博通經史律歷之學所著文集四卷四六
二卷睡花詞一卷管窺一得十二卷徐庾補註四卷

年二十一而卒。著作等身，筆情超邁。弱齡夭折，其夙
懋天授歟。大風泊舟包山，云石腳挿波心，東西水衝
擊，我來風正號，浪花大如席，萬頃奔騰來觸此崖腹。
窄拘怒不得，駢咆哮相關，格飛珠濺青林，迸雪灑丹
壁。砰訇走雷聲，震蕩動心魄。少時月東上，風定湖一
碧。寫奇險之境，歷歷如畫。詩亦蒼勁。

松陵周羽步

瓊

一字飛卿。詩才清逸，有名士態。贈蘇

貞女云：一架薔薇滿院香，同行誰不羨紅粧。生平最
愛清幽事，肯惜凌波遠。曲廊羽步後，遭家難爲女冠。

號性道人

鴛湖黃月輝

德貞

司李守正女孫孫曾楠室工詩賦

與歸素英爲詞壇主持共輯名閨詩選行世著有劈蓮詞余僅見西湖懷古鶯啼序詞長不錄

陽湖惲清於

永

諸生鍾嶺次女毛鴻調室年十三工

畫與姊究心六法尤善花卉翎毛賦色運筆能傳南

田家學詩亦蒼秀題白畫菊云秋花繞砌錦斑爛爲

寫秋花獨閉關天欲老時君正少不妨霜雪鑄紅顏

乾隆初尹文端公繼善曾以清於畫進呈聲譽大起

踵門求畫者無虛日名播海內矣

江都陳爽軒進士黃罔圃室有和鳴集爽軒送黃君
謁選云太平天子文章重清白家風夢寐安又云非
因家計貪清俸却爲蒼生做好官曰吾以做好官爲
君當山盟耳爽軒有風嫁一園花五字亦佳

名媛詩話卷二

錢塘沈善寶湘佩著 受業會稽宗 康校字

元和戈孝女

貞

孝義元鑑女生有至性矢志不嫁孝

事父母六十年盲志云昔有北宮女閨閣終其身至
老貞不字立志在養親鞠育恩罔極當思報三春侍
奉依左右勿間昏與晨居恒承意旨婉愉容色真設
有疾痛癢湯藥先沾脣百年如一日萬念惟二人非
敢云竭力非敢云盡倫區區寸草心藉茲稍吐申願
學嬰兒子愛日殊堪珍又宛平韓孝梅知縣藻女痛

父早卒矢志不字侍母終身母卒絕粒以殉事載懷

甯縣志詠早梅云搖落衆芳菲庭前始放梅甘居百

花後反道最先開又華亭袁清湘寒簾布衣玉屏女

著有綠窗小草清湘早喪母守貞侍父境遇苦厄自

遣云療飢自有忘憂處樂此衡門水一灣漫訝家貧

無四壁家無四壁好看山又吾浙石門聞楚璜璞庫

使譽彥女著有醉鶴樓集譽彥無子令楚璜效男子

裝從師授經年十四工時藝父欲令應試或勸之曰

與爲黃崇嘏何如爲曹大家乎乃止此後仍服男服

不復見客奉養父母終身不字雨晴云雨過蒼苔潤
風迴院落涼露濃秋草瘦日薄晚花香愁以長貧集
詩緣久病荒遣懷時小立屋角又斜陽又常熟趙若
韞秉清知府貴栳女以貞孝請旌著有寄生館吟草
按貴栳爲福甯守有廉名移疾歸貧不自存若韞守
貞不字爲女塾師以助薪水重午有感云痛失慈親
後飄零類轉蓬未從親地下又屈節天中萱草徒看
綠榴花不耐紅魂誰招逝水愠豈解薰風繫縷和愁
結浮觴與淚融苟延殘喘在堂上有衰翁此數人方

之嬰兒子可無媿焉

桂林張義姑父曾叅將有子四皆隸麾下康熙十二年吳逆犯廣西將軍孫延齡叛應叅將抗節不屈父子同殉難義姑聞之抽刀欲自剄旣而曰吾不忍死者之未藏也乃遣人潛覓父兄屍瘞焉窺諸媿無守意又哭曰吾不忍死者之祧斬也會仲嫂婉一男甫彌月卽擲之去義姑爲糜粥哺兒相依惟一嫗晝夜紡績幸得存活兒稍長督課甚嚴遂成名以母事姑歿建祠奉祀邑人重之稱曰義姑許鴻磐爲之立傳

義姑工詩贈沁水孫節婦云析山高峻忠臣搃沁水
清寒節婦苦楊公有女嬪於孫卓哉是女稱是父父
既作忠女象賢早喪所天淚如雨之死靡他誓和丹
斷機又見今孟母冰霜獨勵三十秋兒乃成名孫繼
武一身裕後更光前不同庸碌委黃土輜軒太史來
采風丹鳳翩翩銜詔舞我持彤管拈瓣香千里遙將
懿徽譜西望縹緲仙雲飛或在析山之崖兮沁水之
潯全州蔣蓮姑父母早卒弟甫四歲守貞不字撫弟
成立爲娶胡氏而弟又卒復爲立嗣以延宗祀胡氏

亦守節以終鄉里重之請合祠節孝事載一統志此
二貞女皆出廣西皆能吟詠吁亦奇矣蓮姑焚香云
乍寒乍暖早春天一剪香焚小几邊爲惜名花薰不
得湘簾半捲任飛烟

會稽孟仲齊

思光

教諭稱舜女弟弔鸚鵡塚詩并序

云元時有張玉孃者松陽人文章博雅詩詞得風人
旨時以曹大家比之自號一貞居士侍兒二曰霜娥
紫娥皆有才色善筆札所畜鸚鵡亦辨慧能知人意
因號閨秀三清年及笄字沈生侄侄旋卒父母將另

卜作壻玉孃聞之曰妾所以未亡者爲有二親耳守志至二十八歲夢沈郎迎之而歿父母哀其志請於沈氏合窆於附郭之楓林侍兒皆哭之慟霜娥以憂死紫娥曰兒忍獨生乎義當以殉主也遂自經詰旦鸚鵡亦悲鳴而降鄉人異之咸以殉葬名其塚曰鸚鵡順治初余兄任松陽校官數過其地遺址漸湮因爲之封樹立碑又訪得張大家蘭雪集囑余重校付梓相傳元時有攜其山之高月出小詞至京師爲詩人虞伯生歐陽元所嘆服後乃有以松山葉根長事

汚巖之者吁玉孃貞女亦才女從一而終此事有無
何俟復辨或者依草附木埜鬼興妖亦未可知要以
松地靈秀不鍾於男而鍾於女乃有一女子而輕自
汚巖亦知其俗之匪古已因爲長歌以弔之云千年
恨骨塋秋山一片楓林葉染丹豈是霜花夜凝紫相
思淚血成斑斑一生貞潔心如玉幽居長向蘭房哭
綵絲繡作沈郎容生不相從死相逐山高月小何皎
皎我有所思在遠道所思不見將何如玉容一日秋
風槁聞道沈郎不勝衣夢裡依稀覺也非却恨朱顏

不相見可憐白首空相期翠頰雙鬢共生死綠衣好
鳥重悲啼墳畔樹棲比翼鳥窗前花長並頭枝碧窗
入杏花無主好把鴛鴦比鸚鵡鸚鵡墳前月色黃鴛
鴦塚外斜陽暮茫茫宿草起荒烟苔蝕殘碑臨大路
淒涼落照滿楓林今古傷心在此處此詩足以彰貞
節而白詭傳有關世道人心匪淺

山陰王玉隱

靜淑

號隱禪子爲前明僉事思任女著

有清涼集夫亡清節自守秋日菴居云空齋度深夜
高卧一床秋苔老寒無色溪清淺欲流塵隨紅葉掃

心付白雲收。蕭瑟聞征雁。添將萬斛愁。妹玉映。端淑

號映然子。諸生丁肇聖室。著有玉映堂集。吟紅集。所

輯有名媛文。緯詩緯。玉映天資高邁。楷法二王。畫宗

倪米。幼卽博通經史。父季重嘗撫而憐之曰。身有八

男。不易一女。毛西河。適浙江閩秀詩。偶遺其作。玉映

遂寄以詩云。玉嬌未必無顏色。爭奈毛君筆下何。西

河亟索其集而選定之。題黃皆令畫云。孤亭秋樹色。

卽是雲深處。爲此數峯青。倒逐扁舟去。

太倉王蘭韞。慧學道長源女。諸生朱方來室。有凝翠

樓集筆情朗潔不著纖埃五言如冷泉亭云人世熱
何處我來清到心夏日云紈扇三更月絳琴五夜霜
七言如纔過輕雷收笋簪旋斟新水試茶芽楊柳溪
橋初過雨杏花樓閣半含烟柳絮飛殘青滿徑豆花
零亂綠成圍幾處溪山留薜荔一枝風雨在芭蕉花
深雞犬疏籬外潮落魚蝦小市中王阮亭漁洋詩話
稱之其謁禹陵五言長律沉雄深厚尤爲傑構詩云
明德彌蒼昊神功邁大庭懷襄方盡力輜櫓極勞形
草木開蒙昧龍蛇滌穢腥鑄金九土貢誌怪八方經

倉水先呈簡防風後至刑相傳弓劍棄此地隧泉扁
三古遺祠廟千秋共薦馨璧牲前代典碑版列朝銘
深殿從羣后空山走百靈舊聞雲罕駐今見翠華
停心法傳河洛天章煥日星殊恩沾後裔異數
出明廷肅穆瞻新像登臨泊小舫城垣辭鏤琢戶牖
炯丹青莫覓藏書穴徒看窻石亭蘿長鼯竄跡松老
鶴修翎衆水環襟帶諸峯列幃屏橋山同故事寂寞
對秋垌

婦人集載徐湘蘋

燦

大學士陳之遴室才鋒道麗小

詞絕佳南宋以後閨房之秀一人而已如道是愁心
春帶來春又歸何處及衰楊霜徧灞陵橋何處是前
朝又有感舊西江月云剪燭閒思往事看花尙記春
游侯門東去小紅樓曾共翠蛾杯酒聞說傾城尙在
可如舊日風流匆匆彈指十三秋怎不教人白首金
沙王朗亦工小令浪淘沙閨情云幾日病淹煎昨夜
遲眠強移心緒鏡臺前雙髻淡烟低髻滑也自生憐
不貼翠花釧懶易衣鮮碧紬衫子褪紅邊爲怯游人
如蟻擁故揀陰天疎雨滴清歛花壓重檐繡幃人倦

思慙慙昨夜春寒眠不足莫捲湘簾羅袖護纖纖怕
拂粧奩獸爐香倩侍兒添爲甚雙蛾長鎖翠也自憎
嫌又有學繡青衣閒刺鳳自把金鍼代補翎毛空之
句纏綿妍麗可銷讀者之魂

宗室養易齋女史一等男珠亮室北山別業云沼水
添松色山花補竹痕夜坐聽泉云境杳通秋旨天高
得月情蘭軒女史莊親王女孫嵩山室都統能泰母
有蘭軒遺集夜坐云花與月俱老夢隨詩未刪遊城
南王氏園云再來只恐春難住更繞池臺三四週頗

得閨人遊園之情致

古詩閨閣擅場者雖不甚少而暢論時事恍如目睹者甚難多得漢軍高景芳總督琦女一等侯張宗仁室著有紅雪軒稿夫人工駢體文兼善詞賦有集三十六卷筆力雄健巾幗中巨擘也如輸租行云驢駝口袋牛挽車天陰防雨宜重遮農人惜米如珠寶官府視米如泥沙不辭淋尖與加耗早賜收取容歸家願存升斗買粗布聊與妻兒補破袴盡情傾倒實堪憐羞澁反遭官吏怒驅牛出城口吻乾無錢沽酒當

風寒辛苦回家夜，將半細嚼筐中草。頭飯此詩切中
民間疾苦，與四川西充馬韞雪士琪大梁靈雨吟相

似。靈雨吟云：濕雲壓風，風無力，白日茫茫光閉塞。老
龍怒吸江水渾，三春靈霖足三月。蛟龍得志走高堤，
濤翻浪湧墜天低。大河南北皆澤國，郊原一望沒田
畦。梁園改革稱貧蹙，比戶曾無三斗穀。春麥秋禾委
巨波，井烟處處聞啼哭。哭之淚盡繼以血，有司敲撲
還摧裂。憂國惟知督賦租，餓莩誰慮靡遺子。吁嗟吁
嗟，真可哀。驅車無計驚嬰孩，一女千錢男五百。逢人

便舊敢求益兒女悲號不肯行阿母含愁伴加責兒
去母孤悲不止強持兒價糴珠米無何米盡復思兒
將身暫繼緣楊裏早知兒失母難存悔不當時一處
死我聞此語心痛酸監門思得鄭公官救民重繪堂
前像多恐君王不忍看君王神聖真無極蠲賦恒逾
千萬億減膳徹樂憂思殷蓬萊殿上無顏色安得彼
蒼施高厚電雷倏忽爲星斗陰陽和變兩無乖永令
斯民歌大有韞雪爲知縣雲錦女知縣張應坦室著
有片石齋燼餘草四卷漱泉集二卷又歛縣黃克異

棄兒行中云昨夜良人死空屋阿翁今日填空谷先
死猶得餬飢烏遲死鄰家賣子肉棄兒與君君勿辭
但得兒生死亦足毒哉遭此凶年苦皇天殺人不用
斧吁嗟乎當年得兒如黃金今日棄兒如糞土高夫
人寫官吏之橫暴馬黃二夫人寫小民之流亡皆不
失忠厚之旨

高景芳題米海嶽山水云亂峯高下擁雲鬢烟樹迷
離水郭間記得舟從京口過雨中細認米家山題董
文敏畫卷云青山疊疊水溶溶遠樹微茫近樹濃曾

在東余山下見并刀親手剪吳淞二詩對而生情頗
覺別致

漢軍李松岑

扶雲

菊影云月色照殘三徑夢燈光盡

出一屏秋呂靜齋

坤德

有襄平女子詩稿感懷云識

字更添今日障散花恐惹後人愁孫氏感懷云病後

琴書幽興少夢中松菊故園多余靜昭

性清

有蘭馨

集行路難云旅舍露凝銀燭冷征途風動客衣單四
人筆致亦同

偶讀滿洲思栢之之七夕詩云渺渺銀河風浪多一

年一會尙蹉跎人間更有黃泉別鵲去橋空可奈何
因憶先慈七夕之執扇輕羅趁晚涼恰逢烏鵲駕橋
梁縱然天上歡娛短猶勝人間別恨長又讀兆佳氏
之孤鴻啼冷夜殘雪壓枯枝因憶先慈之寒蟬抱枯
葉瘦蝶媚秋花二詩意境相似按思栢爲永侍郎壽
室兆佳氏爲納蘭生室早寡以苦節稱

江西蓮廳賀秋安

桂

舉人士昌女知縣龍有珠室工

琴善書著有竹隱樓詩草科兒公車北上寄懷云金
鞭續夢月初低石路霜濃滑馬蹄絲冷輕裘風面面

竹連古驛霧迷迷
匏樽酌酒分童僕
土屋開扉見犬
雞革盡寒威
春到眼木榮遲
早聽鶯啼八音詩亦頗
自然錄此以備一格

桐城張柔嘉

令儀

大學士張文端公英第三女少詹

廷瓚妹文和公廷玉侍郎廷璐廷璟姊沈洲門室觀

察孔鈞母王古文著有蠹窗詩集蠹窗云沉水香中夜

漏餘月光冷浸一床書百城未敢誇南面且乞閒身

作蠹魚嗜學之勤亦可概見聞閣書痴與余似有同

情

江蘇興化李芳子

國梅

號韞庵隱士瀚第三女舉人

國宋妹解舉鼎室著有林下風清集古詩最佳余喜
其將進酒云朝吟薤露歌夕進新豐酒黃鵠舉翼四
海窄鵲鵲齷齪夫何有樽前有酒盤有餐請君秉燭
游夜闌我聞人生不滿百何用行憂坐歎凋朱顏君
不見漢家丞相富貴時賓客傾蓋如雲馳片言不合
詔下獄折辱翻遭小吏欺又不見田蚡寶嬰相傾奪
公卿半屬門下客一朝勢盡歸武安魏其筵前誰避
席人情反覆多如此世路羊腸宛相似周公大聖有

流言鄒孟邇說誰見理高牙大纛專城居不如閑行
隴上把耕鋤鳴鍾列鼎食萬戶不如閉門安坐酒一
壺流光駒隙亦易過咄嗟身世徒邱壠試看紛紛行
路者覆車折軸將焉如

漢陽紀蘊玉

瓊

同知陳淞室八歲授女孝經輒成誦

長遵文義工詩詞德行純粹學識淵源著有續餘草
嘗獨坐堂上見一婢有所挾逡巡中門外不進蘊玉
卽邀入婦室婦愕然迎曰姑求何急曰外廂碾米一
婢自外來負重窺探必有所竊故避之婦曰盜者爲

誰姑不察而避之何也曰米失幾何如廉得其寔彼
終身難爲人矣且旣隱其事焉用識其人吾家忠厚
世傳汝輩不可不體此意也因爲四言詩四章訓婦
今錄二首云我聞仁厚齊家之樞小人多怨其可深
誅昔人有言水清無魚又云松栢之下可以息陰察
察爲明福豈來臨告我後人勿替仁心余性卞急錄
此以代韋絃之佩也

歙縣徐閭雅

七寶

諸生芳沆女曹榜聘室生時母夢

仙姬送銅雀硯龍賓墨琅玕紙珊瑚架玳瑁筒水晶

池玉鎮紙曰此七寶也以供閒雅用次日女生三歲
識字五歲解字義性愛宋詩于歸前一日卒卒後詩
皆散失其佳句如山居云山色有無疎竹外詩情濃
淡落花前女蘿葉密全遮屋藕豆花多半碍門石界
雙流橫作澗山圍一掌窄成村山嘴忽明松吐月龍
頭生豔柏經霜蔚然居云怕雨不教蕉放葉驗風常
看柳搖絲舟過梅溪云一尺短帘沽酒店幾堆殘燒
打魚家置之劍南集中幾不可辨

歙縣吳喜珠方如麟室喜珠早寡侍老姑撫稚子以

昔簡稱詩極確麗粵城懷古云仙人不跨五羊來碧
海丹山次第開洗氏談兵名將氣尉佗稱帝匹夫才
功留銅柱存冤魄骨掩花田轉劫灰此是炎方冠帶
國書生曾請葉珠厓月明夜夜聽潮雞豈有珊瑚樹
可棲不嫁誰憐何泰女成仙真愧葛洪妻魍移炎悔
驚濤靜蝶到羅浮好夢迷只有包公賤巖石五丁前
此葬端溪趙家塊肉付厓門王氣憑他海氣吞誰念
宮人皆北去可憐丞相尙南奔江山豈許偏安藉珠
貝堪爲貨殖存莫檢新書添悵悵唾壺敲落玉釵痕

同里徐淑則

德音

爲總督謚清獻妣女進士許迎

年室同知佩璜母夜聞鬼嘯云靜夜生虛籟幽齋怯
病身燈前觀蠶簡窗外動青燐附草聲逾厲因風嘯
更頻巖嶮誠火宅勸爾莫爲人又見番禺劉蘭雪斥
野燐云臨池軌訪衛夫人衙鼓銅龍已報寅山檻騁
光金馬影畫屏曦耀碧雞燐久將正氣留天地豈有
文章泣鬼神花際漫勞誇伎倆然犀曾照本來身一
以定力勝之一以莊語斥之同臻妙解淑則著有緣
淨軒詩鈔蘭雪有梅妝閣詩集余喜夜談時聞鬼嘯

因采二詩焉

余有秋懷十五律頗爲一時傳誦今見綠淨軒集中
亦有秋懷十五律而一種沉鬱頓挫之氣尤勝於余
錄其尤者六章云小葺茅堂似瀼東小秦淮水望連
空伴人愁坐三更月和我微吟一葉風墜露却能驚
野雀張羅罟是弋高鴻慢言性癖耽奇服翠袖閒凭
修竹中鷗鷺啁哳雁邕邕扶病閒吟倚短筇痕擲精
神蒐四庫難將窮達恃三冬石家金谷鳴騶盛揚子
元亭葛覃封蕭艾敷榮偏載道涉江吾欲采芙蓉銀

河射角玉繩低一卷縹緲手自攜秋水涵空沉雁影
疎林脫葉歎烏棲握瑜七澤猶懷楚抱瑟三年枉謁
齊終古每多惆悵事寒蟬徹夜助悲啼西風落葉卷
池臺身世淒涼志可哀怙恃無依雙淚竭蓼莪忍讀
寸腸迴蜀中杜甫羈愁絕榜下劉賁壯志灰千古才
人遭厄運彼蒼何似不生才又是重陽秋禊辰原注
湖以重陽爲秋禊多情秋色酷憐貧園翁滿把分籬菊溪女
盃筐餽湘蕪獄劍豈甘終是鐵甕桐未必竟爲薪深
慚薄俗矜功業欲覓烟蘿一采真朱絃調古賞音難

拋却金徽不再彈。緱嶺昇仙思子晉。惟山拔宅羨劉
安。遺銘須記三緘口。大藥當求九轉丹。徒倚危樓展
遐矚。秋空較與壯懷寬。佳句如過吳門云。白舫輕鷗
外。紅亭細雨中。法螺庵卽事云。泉恬朱魚躍。花飛翠
鳥過。七言如秋夜寄外云。碧雲縹緲初飛雁。翠袖高
寒獨倚樓。探梅云。驢背尋來入畫江。邊歸去雨催
詩。繭子花云。葉從秦女機邊吐。蕊向吳蠶箔底開。春
日園居侍母云。排悶始知詩有力。看花休歎膝無人。
出都云。鸞鵬眯目邊沙白。衰草黏天獵火紅。遣疾云。

自敲石火蒸雲朮旋汲山泉湔乳茶送春云無可奈
何齊夢冷最堪惆悵雨絲微綠淨軒無體不工古風
樂府尤爲擅長叔則爲徐情獻公熒女孫父早歿母
樓太恭人餐霞亦工文翰

凡由王家營入都一路塵沙撲面飲食粗惡風霜途
路之苦不特無物可口兼且無景可目惟趙北口之
十二聯橋垂陽拂水魚艇參差頗覺眼界一清而鮮
鯽肥美價又極廉行客到此莫不飽啖此饌更宜於
南人余至趙北口食鯽口占云僕痛馬瘁倦長途今

日登盤樂有餘寄語朱門彈鋏客從今莫更嘆無魚
今見綠淨軒集中亦有行次趙北口詩云征衣冒絮
怯嚴霜土飯塵羹亦飽嘗研得銀絲鮮鯽美愛他風
味似家鄉

南瀝陳南樓

書

錢香樹太傅謚文端陳羣母賢孝慈

祥著有復菴吟稿畫得陳白陽之神道逸過之家貧

常賣畫以給文端公既貴乃繪夜紡授經圖志慕

高宗純皇帝題詩旌獎洵爲閨中非常樂遇詩稿未

見正始集載題自畫秋葵贈鄒太夫人

原注鄒爲侍
郎一桂之母

云葉出裁青玉花舒染淡金不存脂粉態自有向陽
心命意不凡亦可概見姊穀觀察程兆麟室著有寓
書樓遺稿詩筆超脫潤州云落木風高氣欲秋鳴鳴
吹角古城頭荒烟葉拂藏春塢殘月虛涵望海樓百
戰餘威存古壘六朝遺恨咽寒流當軒惟有三山色
吞吐雲霞萬古留文端公少時最蒙賞識喜其入翰
林云異時勲業名臣傳少日文章大雅宗後文端公
輯其遺稿敘而梓之

滿洲塋秀輕車尉佛隆毅室德松如侍郎齡母侍郎

幼時家貧甚經書皆太夫人口授乾隆八年年八十
上聞其賢製詩賜之藝林艷稱冬夜偶成云一簣
燈火歲將除寒素家風稱素居細剪剡藤三四幅爲
兒黏補讀殘書其清況可想

長洲顧蘭谷

若憲

大令張笠亭之項室有把翠閣詩

鈔送夫子北上云杜鵑喚春歸和風吹芳芷何堪對
斯景把酒送吾子分手卽天涯惜此須臾別緒如
繭絲柔情似潭水離懷寄孤鴻相思托雙鯉征途勉
加餐努力拾青紫上慰高堂心下酬賢伯氏君行旣

雅隋君才復俊美但保金石心蒙門勿投趾桃李易
凋殘松柏豈朝葵行矣勿悲嗟風雲從此始筮亭初
爲印江令以事牽連禍且不測蘭合遺子鳳孫具呈
請代且營贖鏐乃得釋不僅以章句之才也女張于
湘蘓畢秋帆尙書沅叔著有培遠堂集幼詠梅花云
出身首荷東皇賜點額親添帝女粧後子大魁人以
爲詩識焉比開府陝西貽詩作誠云讀書裕經綸學
古怯政治功業與文章斯道非有二汝宦久秦中將
膺封圻寄仰沐聖主慈寵命九重賁日夕爲汝祈

冰淵愼惕勵譬諸構榱材斲小則恐敝又如任載車
失誠則懼躓捫心五夜慙報答奚所自我聞經緯才
持重戒輕易教勅無煩苛廉察無猥細勿膠柱糾纏
勿摸稜附麗端已勵清操儉德風下位大法则小廉
積誠以去偽西土民氣純質樸鮮靡費豐鎬有遺音
人文鬱炳蔚况逢郅治隆陶鈞綜萬類民力久普存
愛養在大吏潤澤因時宜樽節善調理古人樹聲名
根柢性情地一一踐履眞實心見實事千秋照汗青
今古合符契不負平生學不存溫飽志上酬高厚恩

下爲家門庇我家祖德詒箕裘罔或墜痛汝早失怙
遺教幸勿棄嘆我就衰年垂老筋力瘁曳杖看飛雲
目斷泰山翠松徑云曲徑彎環石級高滿庭山色綠
周遭松聲似厭泉聲小自瀉雲門百尺濤庚子

高宗南巡尙書居憂里門謁於行在具陳母氏賢行
御書經訓克家賜之古來賢母教子成名者頗多而
無詩文著述見於後世惟國朝賢母之詩流傳頗

盛而若此煌煌巨篇無懈筆無泛句者亦不多見也

又見桐鄉孔瑤圃

繼瑛

沈觀察啓麓農母工書畫盡夫

遠遊課子讀書而身率小婢終夜紡織嘗有句云窗
下看兒談魯論燈前教婢揀吳棉又云夜枕先愁明
日米朝寒又典過冬衣皆當時實事也觀察成進士
以賜綺爲母裁衣太夫人訓云賜錦初披新樣紫遺
璽莫忘舊時青

常熟蔣蘋南

季錫

論文蕭庭錫女弟侍郎王興吾母

著有清芬閣集太夫人工書精奕畫法娟秀得虞山
宗派示兒云鄴架詩書應徧讀董園花鳥不須窺至
大兒興吾豫藩署中七古末云今朝三顰被水災征

鴻滿目啼聲哀汝爲方伯實司命努力撫綏毋務財

餘千鍾守箴

令嘉

號甘茶老人蔣新畬太史士銓母

著有柴車倦游草太史四齡太安人斷竹攢字數之
口授經書後入詞館就養京師旣而曰吾兒才非適
時者不如歸也太史承命告歸詩工議論筆亦遒勁
金陵云難爲子孫守不是帝王居一片風流地千秋
醉夢餘劫灰塵久積金粉氣難除只有秦淮上笙歌
六代如題自繡梅花詩圖云屈鐵孤梅葬古苔巡撫
寒萼凍難開分明一幅鷺溪絹繡出詩人小像來自

題歸舟安穩圖云館閣看兒十載陪
慮他福薄易生災寒儒所得要知足
隨我扁舟歸去來一艇平安幸已多
胸中原未有風波團樂出又團樂返
兒領髮長母鬢皤書聲纔歇笑聲連
乞棗爭梨繞膝前自笑老人多結習
課孫不及課兒專三十隨夫四海遊
江山奇處每勾留誰知老去清緣在
還坐東南輭水舟湖南湘潭石氏號
慈石老人知縣張力行母七十誕辰
自壽序云余就養四兒力行官舍四
載於茲今七十生朝力行薈萃所乞
壽言歌以侑觴老婦何幸得爲

大人先生齒錄顧其詞類多侈頌愧不敢當根觸余
懷容有不能自已於言者因仿杜少陵寓同谷縣詩
體作歌七首少陵以飄流鳴感而余以數十年脩養
茶蘼之境詞不相襲遇若近之吾子孫能喻此意庶
幾知所勉焉錄四章云憶昔憶昔初作婦鬢髮白髮
娛大母舅扶鳩杖晨上堂捧羹小步君姑後秋風獵
獵動地來護凋椿瘁養何有嗚呼一歌兮歌已哀孝
子有後栽者培原注鄉人稱先有妹有妹矢從一女
舅爲張孝子而不婦老於室青燈紅淚五十年博得烏頭耿嗽日

螺贏負子教誨勞他年大地心堪質嗚呼五歌兮歌

正長相思不見天茫茫

原注妹幼字曾氏所事者不幸而天妹年才十九誓不再

適力請於母氏素服哭奠曾氏子之墓歸局一室勵志守貞母憐之予田數畝以給其養今妹年六十餘矣方得嗣子相依朝夕悲夫獨余就養力行官舍我欲邀妹不果行白首天涯每一念及輒爲淚下也我

來就養愁轉劇鞭扑聲中簿書積循良肆應良復難

聖主深仁在保赤官名父母須慈祥家有子孫要蕃

碩嗚呼六歌兮歌思遲遲前肴酒民膏脂予季鞅掌

問海邊諸孫交戰留湘川人生何能晨夕聚所求無

忝繩其先我家祖德方綿綿我今老健天所憐嗚呼

七歌兮惜終曲嶺簫風香落金粟悱惻纏綿調高語

擊
桐城姚景孟

德淵

通判馬書香室姪尹培章祖母博

學工詩著有清香閣詩鈔寄遵貞太夫人并序云嫂

氏遵貞能詩善畫敬繪白描羅漢冊頁姪菜入觀

進呈仰蒙聖主品題入於內府秘苑珠林俾得與

古名媛墨蹟並傳不朽誠異數也予聞之喜而賦此

云白描妙手重當時百拜焚香獻御墀試問鳳城千

命婦幾人翰墨九重知

貴筑陳昭陽

淑秀

一號玉芳觀察法女給諫慶升妹

諸生周承元室著有玉芳亭詩集燈籠云絲絲入扣
盡文章圖圖中涵太乙光代月頻教星退舍濟人頓
使霧收藏十分虛鑑通千里一點丹心照四方普渡
慈航何處問好當靜夜細思量是題詠者甚少此詩
頗爲雅切

上虞張品香

淑蓮

知州鳳翥女知縣夏琳母著有澄

輝閣吟草幼承庭訓博通經史九十自壽云八旬剛
喜集華裾花裏頻年奉綵輿身閑平安還是福耳聽

歌頌恐嫌虛養生有術惟知命遣興無方只看書九
十光陰行萬里儘憑白髮笑盈梳猶記親闈問寢忙
春風柳絮滿庭芳傳經錦水依妝閣執饋灤河侍畫
堂塞上雲山都入稿嫁時衣帔尙留箱燈前笑把平
生話應比開元舊事長故園親手課蠶耕繞屋東山
曉翠橫慈教敢誇貽禮法書生須不負科名清芬世
守先廬舊章服身慚異數榮一事差強人意處年來
耳目尙聰明官閣香濃對綺筵喜聞輿論使君賢承
平井里舒民氣羅列曾元慰暮年翠栢霜濃知閱世

紅梅日暖好傳箋他時得遂期願望還乞羣公祝壽
篇富貴壽康閨中罕有詩亦和平工整

如皋熊淡仙

璉

字商珍又號茹雪山人著有淡仙詩

鈔淡仙詩話淡仙兼工詞賦文章幼字陳生嗣生得
廢疾翁請毀婚淡仙堅不可卒歸於陳貧不能給半
生依母弟居晚爲塾師余幼時常聞鬢雪從母云淡
仙境甚困厄老更無依送春云一花一草何曾見却
道來朝是送春螢火云背燈兼背月原不向人明其
遇可想感舊云嘆我浮生不自由嬌癡未慣早知愁

弱齡已醒繁華夢薄命先分骨月憂親老徧逢多病
日家貧常值不登秋眼前俱是傷心事幾度臨風淚
暗流刺繡餘閒就塾時也從花裏謁名師貪看夜月
憎眠早倦挽禪雲上學遲琴案屢吟秋柳句錦箋頻
寫落花詩而今回憶皆成夢悵望當年舊董帷同里
顧希昭淑齡朱章令室著有閨中倡和集書熊淡仙
詩後云無情天亦妬娥眉博得才名不療飢莫怪紅
閨諸女伴只工刺繡不工詩

崑山唐菊圃

其玉

諸生國緒女諸生方蔚室以節

賜旌著有夢留吟草對雪懷雪廬云木落秋容老庭
空夜色明燈殘羣籟寂月冷一心清未踐黃花約難
忘白首情遙知吟望久詩思定縱橫小姑方雪廬
諸生家典女顧某聘室以貞節 賜旌菊窗雜詠云
最愛黃花好其如病體何愁懷憑酒遣佳句到秋多
手倦頻拋卷心閑且放歌由他塵世事滾滾眼前過
雪廬兼精繪事姪女黛如元恕亦善詩畫

奉新宋婉仙

鳴瓊

涂愛庭室有味雪樓別稿婉仙早

寡以詩自遣集中煮茗云呼鬟汲碧泉獸炭紅爐熱

推出落梅風關門煮香雪寫盡云意中新竹樹胸次
舊煙霞信是丹青薄難描富貴花秋思云庭院秋來
百感生風翻露葉一蛩鳴月明萬里家何處腸斷關
山玉笛聲後山春望云滿山春樹尋常見獨撫孤松
未忍回黛色忝天陰覆地曾經歷盡雪霜來真乃閱
歷之言婉仙有無端撞入玲瓏網授我皆非如意珠
之句境亦可慨

每見史籍所載時值夫君子退而小人進卽有一二
正人必抑制之使其才位不稱然後得暢行小人之

志迨至身敗名裂衆口交譏徒貽千古之唾罵豈不
可笑宿遷倪瑞璿詠馬士英詩結句云賣國還將身
自賣奸雄兩字惜梅君可爲確論然往古來今足當
奸雄之稱實無幾人也瑞璿爲進士徐起泰室

太原張古什

學雅

貢生俠長女著有璫餘遺草姊妹

七人皆工詩古什生不茹葷愛持經咒字金壇于氏
未嫁而卒閒詠云竹院蕭森人語空夜來風雨太匆
匆侵晨獨倚闌干角閒數池蓮數朶紅四妹羽仙學
典字古政諸生楊易亭室有花樵倡和吟十歲爲採

避賦兼工繪事與妹凌仙學生尤相憐愛寄書云欲
把音書寄躊躇向筆端恐添離別恨難使旅懷寬蘇
蕙機中錦秦嘉鏡裡鸞迢迢憑一紙何以慰加餐五
妹凌仙學象字古圖諸生沈載公室有硯隱集以苦
節著家貧依姊羽仙爲生日手經史自課其子後益
落乃爲閨塾師雜詠云夙昔愛鳴琴流泉指下生子
期今已沒誰聽斷腸聲七妹古明學賢于星緯室有
華林集閒望云波動風來後花殘雨過時